

տակ ըստ մտաց նոցին լինել համարձակ յիրաւունս մեր ,
 և ազատ 'ի բռնութենէ Յունաց , և զբաժին տեղիս մեր
 'ի տաճարին Ս . Յարութեան մեք շինեացուք , և սուղ ինչ
 վիճարանեալ 'ի վերայ այսր խնդրոյ փակեցաւ Ատեննն :

Նիստ Երկրորդ , ('ի 11 Ապրիլի) :

Ի սոյն նուազ կազմեցաւ Ատենն մեծ քան զառաջինն՝
 զի յաւելան 'ի նոյն ոմանք 'ի Նախարարաց . սկիզբն խոսեցան
 Հայք ըստ առաջին բանից . եւ 'ի հարցանել Դատաւորաց
 ցՅոյնս՝ մատուցին նոքա Ատենին հանրագրութիւն ինչ
 բազմակնիք 'ի դիմաց բոլոր ազգի իւրեանց , լցեալ
 բանիւք բարուրանաց և գանկատանաց ընդդէմ Հայոց , և
 ընթերցեալ զայն Ատենակալաց՝ չետուն ինչ պատասխանի :
 Մատուցին Յոյնք զկարծեցեալ զիրն Օմարայ , յոր յուսացեալ
 էին՝ այլ չեգիտ նա ընդունելութիւն ինչ յԱտենի
 անդ . աղաղակ բարձին Յոյնք և ասեն՝ սա է դաշնագիրն
 մեծին Օմարայ՝ պարտիք կատարել որ ինչ 'ի սմա գրեալն է .
 Հայք ետուն պատասխանի՝ դաշնագրութիւնն լինի 'ի մէջ
 երկուց հաւասար տէրութեանց , իսկ հորատակի դաշնագիրն
 հարկատոման է . զարմանք են որ ընդ մեծազօր Տէրութեան
 դաշնագիր ունիմք ասէք : Ետուն զպատճէն Բէնչէի
 մարգարէին և առաջնորդին Արաբացւոց , գրեալ 'ի
 բարբառ նոցին՝ ընթերցան և զայն : Հայք ասացին՝ սա
 ոչ վասն Երուսաղէմի է՝ զի չիք 'ի սմա անունդ Երուսաղէմ
 եւ ոչ հարկաւոր 'ի վէճն յառաջակայ , այլ վասն համարձակութեան
 վանականացն Սինայի : Ապա հանին ըզհրովարտակն
 Սուլթան Մահմուտի առաջնոց , տուեալ 'ի թուին
 Հիճրէթի 1104 զոր առեալ էին 'ի դատին ընդ Շղթայակիր
 Պատրիարքին , զորոյ զպատճէնն ունէին Հայք , որպէս
 և զայլոցն , և գիտէին զգրեալն 'ի նմա . Բէիզ Էֆէնտին
 առեալ զայն սկսաւ ընթեռնուլ , և մերձ 'ի վախճանն
 լռեաց . յառաջեաց Փոխանորդ Պօղոս վարդապետն
 և ասէ՝ բոլորն ընթերցցի , Բէիզն ասէ՝ ահա կատարեցաւ ,
 կրկնեաց անդրէն Պօղոս՝ մինչ խալառ ընթերցցի , զի գոյ
 'ի դմա հարկաւոր ուսանելիք . և նորա ընթերցեալ աւարտեաց ,
 որոյ 'ի վերջին տողս գրեալ էր , երեք ազգք՝ Լատինք ,